

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni Inatsisartut aallartitaasa siulittaasuata Josef Motzfeldtip aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 5/2011-mik, ataani allassimatut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut:

**Nunat Avannarliit Killiit Siunnersuisoqatigiiffiata Islandimi, Savalimmiuni Kalaallilu Nunaanni naalackersuisut kaammattorpaat Islandip, Kalaallit Nunaata Savalimmiullu akornanni angalanerni aqqusaarnernilu nunani avannarlerni killerni innuttaasut nammineq nerisassaminnik nassarsinnaanermut periarfissaqarnissaat anguniaqqullugu.**

Tungavilersuut:

Nunat avannarliit killiit ataatsimut ilisarnaataasa ilagerpiarpaat nunani ataasiakkaani periaasitoqqat malillugit nerisassianik ataatsimut mamarisaqarnertik.

Taamaattorli naak nerisassat nammineq nerisassatut eqqarsaatigineqaraluartulluunniit angalasunit Islandimut eqqunneqarsinnaaneq ajorput. Angalasut Islandimut aqqusaartut Islandimut isilernerminni nerisassaatininnik arsaarneqarnertik misigisarpaat. Akerlianik tamanna pineq ajorpoq Islandimit angalasoq nammineq nerisassaminik Kalaallit Nunaannut Savalimmiunulluunniit eqqussiniarpat. Island ukiuni kingullerni nunanut avannarlernut killernut angalasunut qitiusunngorsimavoq, taamaattumillu pingaaruteqarluni matumani aaqqiissuteqartoqarnissaa nunat akornanni angalanermi akimmisaarutinik pisariaqanngitsunik misigisoqartaqqunagu.

Taamatuttaaq aamma imatut pisoqarsinnaasarpog silap ajornera pissutiginnarlugu timmisartoq Tunumukaraluartoq Islandimut mittariaqaraangat unnuisariaqartoqalerlunilu, taamaattoqarnerani misigineqarsinnaasarluni nerisassat nunatta iluaniinnaq nassatassatut eqqarsaatigineqaraluartut arsaarinnissutigineqarnerat.

Ajornartorsiut aamma kilisaatinut inuttanut atuuppoq, taakkumi aamma nammineq nerisassaminnik nassarsinnaaneq ajormata naak nerisassat pineqartut mittarfimmiit kilisaammut assartorneqaannartussaagaluartut.

Nunat Avannarliit Killiit Siunnersuisoqatigiiffiata naalackersuisut kaammattorpaat nammineq nerisassanik eqqussisinnaaneq eqqarsaatigalugu nunat avannarliit killiit akornanni angalasunut assigiiartunik atugassaqartitsisoqarnissaata qularnaarneqarnissaa sulissutigeqqullugu.

Nunat Avannarliit Killiit Siunnersuisoqatigiiffiata ajornartorsiut tamanna iluarsiniarlugu nunani pingasuni naalackersuisut suliniutinik sunik aallartitsiniarnerannik nalunaarfigineqarnissani kissaatigaa.